

Antía Pérez, parte do ESOMI, entende que o Laboratorio debería de fomentar a creación de coñecementos en común e para o común que reverteren no deseño de políticas públicas e na formación de iniciativas sociocomunitarias que desborden o marco do institucional. Centrándose nas dinámicas e no funcionamento do Co-Lab, sinala o interese que suscitaría a creación de temáticas polos propios participantes, para así abordar os problemas e retos do xeito máis transversal posible. Ademais, entende imprescindible acordar e manter unha serie de principios participativos, inclusivos e democráticos, fomentando a implicación desa diversidade de voces e saberes.

No referido aos retos e riscos, apunta cara xerar vontade e ilusión por participar, sen perder nunca de vista a xa comentada inclusión das diversidades. Nesta liña, identifica como unha ameaza importante a predominancia dos “sospeitosos habituais” entendidos como persoas que xa se coñecen e aínda podendo desenvolver traballos interesantes non transcenderían os círculos de acción e influencia xa establecidos. Transformando o risco en reto, trataríase segundo a entrevistada de conseguir involucrar “aos que non están” facendo un exercicio de tradución das iniciativas para poder chegar a tanta máis xente diversa posible. Como último gran risco, sinala a posible tendencia de que o Laboratorio se poida converter nunha caixa de lexitimación das políticas municipais e de captación de fondos europeos, sen realmente desenvolver un traballo autónomo.

Abórdase tamén na entrevista a cuestión da autonomía e independencia do Laboratorio. A entrevistada sinala como pode darse “un equilibrio tenso” en tanto coexista unha determinada xente preocupada por desbordar o ámbito institucional pero de xeito paralelo outros grupos entendan que ese ámbito, o institucional, é un ámbito prioritario de intervención política e que a participación destas persoas no laboratorio pase pola eficiencia e institucionalización do mesmo.

Por último, no referido ás temáticas, a entrevistada anota a necesidade de engadir o social no laboratorio. Analiza que dado un contexto de exclusión e pobreza o traballo do Laboratorio debería abordar os eixos de desigualdade principais para poder ter unha incidencia positiva. Ademais, comenta a importancia de contar e engadir a quen xa se está a organizar dende e contra esas situacións, sinalando como o mundo dos coidados é un bo exemplo de temática que o proxecto debería abordar.